

尺深者以備駛赴荊州宜昌等處擇要駐泊此爲巡緝上游備豫不虞之用一種吃水三尺深者以備南浮湘水可由長沙以達衡州北入襄河可由安陸以達襄郡此爲巡緝內港鎮懾匪徒之用核計每艘工料價值大者不過七八萬兩小者不過二三萬兩期於就深就淺利用咸宜水陸兵備一律完固以仰副 朝廷勤修武備綏靖長江之至意謹 奏

署四川總督錫奏川邊巨匪就殲地方安靜摺

竊川省東南與滇黔接壤犬牙交錯山險路歧久爲盜賊淵藪雖已移會雲貴巡撫臣嚴飭沿邊文武認真搜捕往往此拿彼竄漏網吞舟小醜巨魁聲氣廣通官兵束手在紳團豈甘於通匪而偶有力能捕賊者立被焚殺搶掠毒虐之慘令人膽寒所以雖良民之家無不結交徒黨冀以免害民匪混成一片幾於良莠不分論者謂川南隱患釀久而發甚於粵西奴才心竊憂之倘再養癰必至不可收拾去秋蒞任訪察明確卽於冬間 奏派署永甯道趙爾豐督察敍永捕務兼防滇黔各邊其間著名股匪惟尹煥章羅海亭爲最而貴州仁懷廳之彭青臣卽彭小老團次之尹匪上年在昭通永等縣刦殺羊羣客連傷差團並捉人碎屍拋江經前撫臣李經羲會川協緝未獲凶蹤益張羅匪去歲三月在琪縣地方竟敢戕害副將岳培高及勇丁多名奏明有案該兩匪狼狽相倚狡獪絕倫黨羽各千餘人私購新式槍

軍事

四十二

二月

礮甚多器利人衆四出擾害在眞溪劫商店在健爲搶鹽本在宜賓戕練勇斃團丁此外焚劫巨案所在皆是行者各有戒心自趙爾豐到任永甯隨時單騎率勇嚴搜幽險首要零星游匪捕斬數十名翦其羽翼略示兵威隨飭統領續備後軍知縣劉朝鎔督辦敘南六屬團練嚴清內奸分防要隘稔知該軍左營管帶參將陳忠良具有勇畧其部下哨弁鄧忠信又係前護督臣陳璘奏明招降勒令戴罪立功之鄧瀛州因檄該參將責成鄧忠信帶隊捕匪自効授以機宜期在必獲並由前署敘州府另補直隸州知州榮麟督飭各屬派練嚴密防堵該道一面懸立重賞購線捕緝一面出示曉諭以明利害解散脅從會諜報兩匪却得鹽本銀兩由屏山境內竄走老樹村立派兵團合追截擊接仗數次生獲羅黨許吉亭等審訊賊踪偵確羅匪已回郭家墳老巢隨經鄧忠信等馳往川滇交界之溫家坳遇該匪率悍黨百餘抵死抗拒我軍四面兜拿併力前擊將其轟傷旋即斃命報經電飭戮屍梟示餘黨亦陸續斬獲殆盡此剿辦羅海亭一股之實在情形也羅匪授首尹勢漸孤然猶據窟多處嘯聚負嵎夥購快槍心殊叵測又買結窮丐游民脅制團紳糧戶使各吞聲忍氣莫敢誰何其聲息之靈黨援之多較羅匪尤甚趙爾豐慮剿捕愈急竄匿愈深勢必勞師曠日因飭陳忠良以計取之先離其黨援斷其接濟聯絡隔省紳團皆爲我用探悉賊黨如張廷標等先後

星散乃節節密布網羅擇土人爲鄉導命差弁王雲安改裝深入虎穴相機誘致當是時官兵不露聲色匪等以爲捕弛亟圖出覘動靜又恃備多無患率悍賊多人執械在前及自復興場至瀘州九姓司之沙磧見勢知敗正欲拒逃適四面伏發衝突無路猶回槍猛擊移時我軍憤激圍撲奪槍始一鼓生擒並獲悍目劉興順等數名一併解營正法竄逃餘匪以次戡平此剿辦尹煥章一股之實在情形也至黔匪彭青臣一股去年匪勢盛時曾竄入合江縣勾引仰寶場蟲斃團衆燒燬民房當經勒緝要犯二十餘名盡法懲辦匪首彭青臣大股竄擾苗溝等處先由劉朝鎔分派弁勇馳往會剿趙爾豐隨亦親督進剿駐紮琳溪各營團深入巢穴窮搜巖谷於川黔兩境人迹罕到之處跟踪掩捕斬獲多名圍攻十許日始將彭匪擒獲並獲悍黨屈耀先林吉香等數十名訊明就地正法將窩匪老巢盡數剿平苗溝本係通黔大道行旅久絕至此已商貨暢行民安耕作敍南各州縣伏莽於是一清伏查尹羅各匪以數年逋寇爲三省邊患迹其戕官劫帑無惡不爲直已形成叛逆設非及早殲除更將勾結蔓延無知妄徒復從而附和之川省人心浮動加以旱災鬧荒仇教各處響應蹂躪必廣非獨糜餉勞師大局何堪設想幸該道等百計圖維智誘力取不數月間能使首要駢誅裹脅者亦俱回心革面弭鉅患於無形所以保全甚大謹 奏奉 硃批著照所請該部

知道欽此

署兩廣總督岑等會奏收復羅城縣城剿匪獲勝請獎尤爲出力各員摺

竊照三防股匪於八月十四日竄踞羅城縣城飭署右江道龍濟光督營收復並於小長安一帶兩次追剿獲勝先經臣等摘要電奏聲明在事出力人員另摺請獎在案當八月初三日匪陷三防分股下竄前敵各軍被匪阻隔轉在賊後臣春煊適在慶遠屬之濟字營馳往援剿詎兵未發而悍匪歐四白毛七等率黨二千餘圍攻羅城縣城署知縣李澤先率練兵出外防剿衆寡不敵死傷過半十四早匪由城東南隅攻入城遂失陷時龍濟光所帶各軍尙未調集即先率兩哨及餘卒二百人星夜馳赴羅城自十五夜戰至十七辰刻始奪回城外潘羅兩村及硯山獅子山而匪由黃金龍岸一帶來會者不下七八千人龍濟光督隊晝夜苦戰二十二三日調濟營及慶防副中營陸續趕到二十五晚龍濟光重懸賞銀激勵將士派濟字選鋒營扼城外鳳凰山分隊進攻西門又派前營由城東南隅進攻派濟字右營副中營慶防副中營及奏革知縣李澤督率練兵由南門進四路衝突忍死血戰斃匪約三百餘人至二十六日黎明各營進抵城下龍濟光親率附生楊漢蒙錫麻奮力進攻一鼓登城遂將羅城縣城收復匪由東門奔竄小長安龍濟光卽飭李澤先入城安撫百姓一面